

Penerbit UMS menang anugerah Buku Negara

BH 23.02.2012 4

KOTA KINABALU: Universiti Malaysia Sabah (UMS) melakar sejarah gemilang apabila Penerbit UMS memenangi Anugerah Buku Negara 2012 bagi kategori Buku Mewah Terbaik (Bergambar) menerusi buku terbarunya bertajuk *Perarakan Berjubah Graduan di Bandaraya Kota Kinabalu*.

Ketua Unit Penerbit UMS, Prof Syed Azizi Wafa Syed Khalid Wafa, dan penulis buku iaitu Prof Madya Dr Mahmud Sudin menerima trofi dan sijil anugerah daripada Menteri Pengajian Tinggi, Datuk Seri Mohamed Khalid Nordin, di Pusat Dagangan Dunia Putra (PWTC), Kuala Lumpur, baru-baru ini.

Dr Mahmud yang juga Dekan Sekolah Pertanian Lestari UMS Kampus Sandakan berkata, buku berkenaan antara lain memaparkan unsur transformasi minda ke arah

merangsang motivasi masyarakat dan memperkukuh keserjanaan graduan.

"Ia turut menampilkan semangat patriotik, hubungan universiti dan industri serta sektor pelancongan, selain gambar busana rasmi Lembaga Pengarah, Ahli Senat, graduan dan pasukan beruniform UMS menerusi peristiwa sepanjang tahun," katanya di sini, semalam.

Prof Syed Azizi berkata, pihaknya turut menerima ucapan tahniah daripada Naib Canselor UMS, Datuk Dr Kamaruzaman Ampon atas komitmen dan kejayaan penghasilan buku berkenaan.

"Ini adalah julung kalinya Penerbit UMS menerima anugerah tertinggi ini dan bakal menjadi pendorong ke arah usaha penerbitan berkualiti pada masa depan," katanya.



SYED AZIZI Wafa (kanan) dan **Mahmud Sudin** bersama trofi dan sijil anugerah Buku Negara 2012 yang diterima di PWTC, Kuala Lumpur.